



Broj:

Sarajevo, 04.11.2020. godine

PARLAMENTARNA SKUPŠTINA BOSNE I HERCEGOVINE
PREDSTAVNIČKI DOM

n/r predsjedavajućeg, gđin. Nebojša Radmanović

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLIENO:	05-11-2020		
Organizaciona jedinica	Klasifikaciona oznaka	Radni broj	Broj priloga
01	50-1	2125/20	

Na osnovu člana 8. Poslovnika Predstavničkog doma Parlamentarne skupštine Bosne i Hercegovine („Službeni glasnik BiH“, br. 79/14, 81/15, 97/15, 78/19 i 26/20), podnosim

ПОСЛАНИЧКУ ИНИЦИЈАТИВУ

kojom Predstavnički dom Parlamentarne skupštine Bosne i Hercegovine zadužuje Vijeće ministara Bosne i Hercegovine da u roku od 60 dana od dana usvajanja ove inicijative, donese Odluku o usvajanju Strateškog dokumenta za oblast mladih na nivou Bosne i Hercegovine, kako bi se omogućilo povlačenje sredstava iz IPA fondova u oblasti mladih, te se s tim u vezi zadužuje Ministarstvo civilnih poslova Bosne i Hercegovine da poduzme sve potrebne aktivnosti kako bi se u što kraćem roku, a ne kasnije od 30 dana od dana usvajanja ove inicijative stavila u funkciju Komisija za koordinaciju pitanja mladih u Bosni i Hercegovini.

Образложење

Vijeće ministara Bosne i Hercegovine je na 14. sjednici održanoj 29.07.2020. godine usvojilo Program rada Vijeća ministara Bosne i Hercegovine za 2020. godinu. Navedeni Program rada dostavljen je Parlamentarnoj skupštini Bosne i Hercegovine dana 11.09.2020. godine. Pod tačkom 1.1.1.2. predmetnog Programa rada u poglavlju „Unapređenje normativnog i strateškog okvira u oblasti obrazovanja i mladih“ navedeno je sa rokom realizacije „četvrti kvartal 2020. godine“ usvajanje Strateškog dokumenta za oblast mladih na nivou Bosne i Hercegovine. U obrazloženju ovog programskog cilja navedeno je da se donošenjem navedenog podzakonskog akta od strane Vijeća ministara Bosne i Hercegovine omogućava povlačenje sredstava iz IPA fondova u oblasti mladih, s obzirom da je osnovni zahtjev Evropske unije donošenje dokumenta strateškog tipa na nivou Bosne i Hercegovine. Većina drugih zemalja regiona i zemalja članica Evropske unije imaju državne zakone o mladima. Uvažavajući političku situaciju u Bosni i Hercegovini i činjenicu da pitanje mladih ne spada u isključivu nadležnost institucija BiH, smatramo da je usvajanje strateškog okvira za pitanje mladih minimum koji se mora ispoštovati. Bez strateškog okvira nije moguće povlačiti sredstva iz IPA fondova, ali i neće biti moguće adekvatno se suočiti sa rastućim trendom odlaska mladih iz Bosne i Hercegovine.

U vrijeme aktuelne pandemije koronavirusa (COVID-19) ovo pitanje još više dolazi do izražaja, jer mladi moraju dobiti perspektivu da ostanu u Bosni i Hercegovini, a ta perspektiva ne može se pružiti u situaciji političke i ekonomske krize. Zbog toga je važno kontinuirano raditi na položaju mladih u Bosni i Hercegovini, prije svega kroz programe zapošljavanja i razvoja samostalnog preduzetništva. Nadalje, razlog za donošenje strateškog dokumenta ovog tipa leži i u činjenici da Bosna i Hercegovina ima negativne demografske trendove kada su u pitanju mladi. Prema podacima koje je objavio UN, Bosna i Hercegovina je u posljednjih deset godina izgubila 10% svog stanovništva. Prema istom izvoru, do 2030. godine, a najkasnije do 2050. godine, Bosna i Hercegovina će ostati bez više od 20% svoje populacije. To znači da su nužne nove socijalne politike koje će pokušati zadržati mlado stanovništvo u Bosni i Hercegovini i s tim u vezi dalje razvijati pronatalitetne politike.

Na kraju, dodatni problem kada je u pitanju politika prema mladima na nivou Bosne i Hercegovine predstavlja činjenica da još uvijek nije formirana Komisija za koordinaciju pitanja mladih u Bosni i Hercegovini. Ova Komisija je u smislu navedene inicijative posebno važna zbog njene uloge da „predlaže nadležnim organima strateške reformske prioritete u omladinskom sektoru“, a predmetni Strateški dokument za oblast mladih na nivou Bosne i Hercegovine predstavlja upravo jedan od takvih reformskih strateških prioriteta. Vijeće ministara Bosne i Hercegovine je donošenjem nove Odluke o osnivanju Komisije za koordinaciju pitanja mladih u Bosni i Hercegovini („Službeni glasnik BiH“, broj 10/17) stvorilo sve potrebne preduslove da profunkcionira u punom kapacitetu ova Komisija koja je stalno i najviše savjetodavno tijelo za koordinaciju omladinskog sektora u Bosni i Hercegovini.¹

S poštovanjem,


Dr. Denis Zvizdić

¹ Prema ovoj Odluci Komisija za koordinaciju pitanja mladih sastoji se od sedam članova, od kojih su četiri predstavnici institucija vlasti u Bosni i Hercegovini, a tri člana predstavnici omladinskih organizacija iz Bosne i Hercegovine. Osnovni zadatak ove Komisije je da analizira, procjenjuje stanje, napredak i potrebe cjelokupnog omladinskog sektora u Bosni i Hercegovini, da predlaže nadležnim organima strateške reformske prioritete u omladinskom sektoru, da daje preporuke za usklađivanje zakonodavstva u Bosni i Hercegovini u oblasti mladih, da daje savjete i preporuke Ministarstvu civilnih poslova u oblasti mladih itd.